

Жаңа Жолдаудан күтеріміз көп

Таяуда Мемлекет басшысы Қасым-Жомарт Тоқаев Қазақстан халқына «Жаңа жағдайдағы Қазақстан: іс-қимыл кезеңі» атты кезекті Жолдауын жариялады. Жолдаудың жұрт көңілінен шығар жағымды жаңалықтары да аз емес. Мәселен, кең байтақ еліміздің экономикасын өрге сүйрейтін негізгі салалардың санатындағы ауыл шаруашылығының өзекті мәселелері, еңбек адамының төккен терінің тым арзан бағалануы, т.б. Президент назарынан тыс қалмапты.

Жердің шетелдіктерге сатылмайтынын жеткізіп, қоғамда, әлеуметтік желіде даудамайға ұласқан пікірталасқа нүкте қою да біздіңше көрегендік болды. «Көреген басшы елді өсіреді» деп дана халқымыз да осындайда айтқан болар. Оған қоса Мемлекет басшысы ұзақ мерзімге берілетін арзан несиенің болмауы да ел тұрғындарының әлеуметтік жағдайының оңалуына тұсау болып отырғанын тарқата айтып, кәсіби мамандар тапшылығын жоюды шұғыл түрде қолға алуды тапсырды.

Білімді елдің болашағы баянды. Бұл салаға да Жолдауда айтарлықтай басымдық берілген. Яғни, келесі жылдан бастап бала жанының бағбандары – ұстаздар қауымының да жалақысы 25 пайызға артып, бұл мақсатқа алдағы үш жылда

қосымша 1,2 трлн. теңге бөлінбек.

Диплом тарататын ЖОО-ларды жабуды ұсынып, мәселені төтесінен қойған Мемлекет басшысы білім беруді табыс көзіне айналдырудың алдын алу арқылы зияткер ұлт қалыптастыруға кедергі болатын әрекеттерге тосқауыл қоюды көздейтінін де байқатып отыр. Демек Үкіметке жүктелген үздіксіз білім беру тұжырымдамасынан үміт мол. Қолжетімді әрі сапалы білім ғана ұлтты биік шыңға жетелейді.

Дала данышпаны Хәкім Абай да «Бір ғылымнан басқаның, кеселі көп асқанға» деп бекерге тәмсілдемеген болар. Олай болса, Президентіміздің ғылымды дамытуға тың көзқарас пен жаңа тәсілдердің аса қажет болып тұрғанын ескеріп, жыл сайын әлемнің жетекші ғылыми орталықтарында 500 ғалымның тағылымдамадан өтуін қамтамасыз етуін тапсыруы, ғылым дейтуғын ұшы-қиыры жоқ ғажайып әлемге имене аяқ басқан жас буынның алғашқы талпынысын барынша қолдап-қуаттап, «Жас ғалым» жобасы аясында 1000 грант бөлуді міндеттеуі құптарлық-ақ қадам.

Әрине, Президентіміз айтқандай ірі бизнес өкілдері, ескелең ұрпақ қамы үшін өңірлік университеттердің ғылыми қызметін өз қамқорлығына алса, нұр үстіне нұр болары анық. Осы



тұрғыдан келгенде біз де елімізді ғылыми-технологиялық тұрғыдан дамытудың арнаулы бағдарламасы жасалғанын құп көреміз.

Қорыта айтқанда, қоғамдағы түйткілді мәселелерді арқау еткен, табысты мемлекетке айналуды мұрат тұтқан бұл Жолдаудың жөні бөлек. Өйткені әлемдік індет әлек салып, әлеуметтің әлеуеті әлсіреген тұста қай салаға болсын жаңа леп, тың серпін қажет-ақ.

Жаңа Жолдау осы олқылықтардың орнын толтырады деп сенеміз. Ел Президентінің Жолдауын мейлінше насихаттап, межесіндеттерді мінсіз жүзеге асыру – ұжданды да ұлтжанды азаматтың бәріне ортақ міндет.

Сейдехан ӘЛІБЕК,
М.Әуезов атындағы ОҚУ
колледжінің директоры,
тарих ғылымдарының
докторы.